

長壽縣志 卷之六  
又施綿衣數百件全活者數千人鬻產二區以供其費有司上其事額其門曰作善必昌時大疫延醫施藥周藩親爲文贈之又建修老龍等橋爲善不倦聲稱猶嘖嘖里巷間

李鈞衡字鈐甫邑庠生性恬淡敦仁讓有族叔占其產可值百餘金不與爭辨後叔負官銀而逃存叔產以已產售而償之叔歸大爲感愧仍以所有產爲叔居族有三歲遺孤撫養如已子族人有絕墳皆爲祭掃刻條訓于石儆後人無忘一本之誼他如讓地修

橋諸善不一巡梁使沈公旌之曰舟楫宏材子四人  
長重素辛酉舉人次重質太學生重本重樸皆賢群  
推爲忠厚貽謀云

趙邦彥葛西里民性慈好善明季屢值凶歲施財施  
粟全活者千餘人又躬爲煮粥以濟他鄉流離并給  
其衣糧每於讀書者更加厚焉其後子孫皆英敏博  
通人以爲爲善之報邑令旌其門曰激勸維風以上義行

論曰孝子仁人不可一世葛邑尤尚此風或因天  
性所全或爲氣誼所激祇竭其生平不自己之懷

而其人已足千古矣後之人能勿觀感而興起也歟

隱逸

太史公登箕山而想許由之高風蓋以瀟灑出塵之跡寄我慨慕殷遙之致而已葛去箕山潁水之間不爲遠矣求所謂逸民者流不少概見豈其典籍淪亡老成凋謝流風餘韻泯沒而不得也耶近得彬魯花隱一人其曠懷雅致猶有逸民之風箕潁芳規二君庶不愧矣

朝

張煥斗字彬魯天資淳茂儀度端方少受業于路明  
忠先生之門先生指之曰吾之曾參也篤志好學不  
求聞達高情逸韵老而益篤杜門却掃日與二三弟  
子講論史傳能自得于心之所可而不求合于流俗  
見之篇章歌咏者洪博淵深一時取功名者多出其  
門人或稱譽欣慕之亦不屑就雖賓朋雜沓議論蜂  
起若有傲然不羣之致以其中情皎然人亦不爲異  
也幽懷夙著潛德終身壽八十九卒

花隱王玉璣者字標五其先許人居葛之石固鎮家  
世耕讀璣生有異質少補博士弟子員尚氣節重然  
諾人以此稱之明季羣盜蜂起與鄉人結寨固守散  
資財以贍貧乏率子弟晝夜巡警寇莫能攻及汴城  
破賊四出剽畧知璣名先以金帛貽之欲羅致爲用  
脫身走河北賊劫其妻李氏以構璣李氏罵賊死賊  
并磔其二子事平歸家痛創亂之相尋感變遷之靡  
定絕意聞達足跡不入城市築園于其鄉臺池院落  
委曲亭峙蒼松翠竹掩映于左右雜以名花怪石

秀階除爲棲息地性尤愛牡丹于幽曠處悉爲栽植  
株以萬計地以頃量極天下艷色奇品人所稀覯者  
不下百種當花發時雖天章雲錦不足以擬其麗也  
自始放至于爛熳璣不能頃刻暫離清露晨流香風  
夕舉嘯咏盤桓輒有欣欣自得之狀花隱其自號也  
人來賞之者必欵接流連朝夕不倦倘有採摘將去  
頗有吝色旣工培護加之珍惜故數十年來能保其  
繁盛昔楚粵未靖車騎往來有惡少年以放馬蹂躪  
恐之挾其多金亦不甚惜及登耄耄艱步履子姓輩

結藍與昇之每日游行花間周覽歎賞戀戀不忍捨去沈宮端繹堂分巡梁許時偶過其園深相賞識呼璣與語見其童顏鶴髮尤敬異之稱爲牡丹主人名其園曰樂志其地遂爲中州名勝凡薦紳往來過此者必造請談讌以名篇佳咏相贈貽者不一米太史紫來知長葛時有加禮焉壽百歲卒子七人皆庠生長之珍能世其業有聞于時

論曰張君高致不可復睹矣花隱之風猶可想見牡丹至今繁盛入其園者如季倫以錦繡作地衣

使人無下足處光怪陸離應接不暇如笑相迎如  
舞相接香風拂拂時來逼人細視其品之變幻色  
之艷冶怡神奪魄不能定情似此勝地雖淵明栗  
里君復孤山何多讓焉惜無採菊之歌觀梅之作  
使人嘆咏留連耳聊賦數章補其未脩云爾見藝

文志

耆壽

洪範五福先之以壽傳言壽可以脩諸福故首及之  
也况



長壽縣志 卷之六  
國家尤重敬老之典前

恩詔所及凡登耄耄者更加賞賚賜也承乏茲役但見  
鶴髮駘背蒼顏古貌者熙熙攘攘接踵而來北望稽  
首遙祝 無疆歡聲雷動猗歟盛哉葛邑自古多耆  
民如鄭維藩一百二十歲未識亡時登百歲者累累  
惜不預于今日之 盛典也其入冊蒙賚者二十四  
人至於婦德而躋上壽何莫非一時之人瑞耶並列  
之亦以徵

昌隆之運而爲邦邑之光而已

鄭維藩葛氏盧梓過訪見其堂聯云身經花甲二周  
膝繞斑衣六代時年百二十歲尚健不知卒於何時  
也

李起九十二歲

郭惠疇九十二歲俱見前列傳

許高節九十歲

陳鉞九十歲俱見孝義

張煥斗九十二歲

王玉璣一百歲俱見隱逸

張東法字近川壽九十入歲

李湯民字振山壽八十七歲

康熙二十八年欽奉

恩詔事例年七十者免一丁侍養年八十者賜米一石  
絹一疋棉一斤肉十斤年九十者倍之葛邑入冊入  
十以上蒙賚二十四人列之寸左

夏繼堯年八十八歲

程國佐年八十九歲

王志京年八十三歲

李 忠年八十四歲

王愛民年八十六歲

左輔哲年八十二歲

張國讓年八十六歲

劉國棟年八十三歲

楊 貴年八十一歲

宋世英年八十二歲

郭中玉年八十九歲

李 叅年八十二歲

賈應時年八十五歲

張文道年八十二歲

賈蘇年八十六歲

吳桂年八十六歲

翟可榮年八十六歲

張洪恭年八十五歲

張漢卿年八十三歲

孟三心年八十三歲

尚士勲年八十五歲

趙氏年八十八歲

薛自白年八十二歲

楊存智年九十一歲

陳氏邑民郭養心妻享年九十七歲傳見列女

桑氏邑貢生陳明翰妻享年八十七歲傳見列女

路氏邑民李法古妻享年八十餘歲傳見列女

論曰能全冰雪之貞者必享喬松之壽若陳氏桑氏諸人以數十年之堅貞保此耆頤之遐慶其志良苦矣雖不能悉預

恩榮之典亦不可不表此幽芳之操今與耆民後先並  
列焉亦賢者維世之意也歟

### 藝術

古今書法推右軍而右軍出自鍾太傅又有劉德昇  
其人能變通于正草之間始作行書人皆知太傅而  
不知德昇豈其位望不及之也然而書法則並傳矣  
俱屬萬人其學至今不替邇年有文學武贊者能兼  
鍾王之法而彷彿德昇之跡筆法精工可稱妙品丙  
寅所勒文廟等碑可睹也若夫張君之相車子之畫

各極其生平之致意而抵於神化不可同類而並觀也哉

漢

劉德昇字君嗣始作行書卽正書之小變務從簡易相間流行故曰行鍾繇謂之行釋兼真則爲真行兼草則爲草行德昇卽行書之祖後世真草行皆宗焉

魏

鍾繇已見列傳爲古今書法之祖學書臺洗硯池其跡尚存葛邑善書者代不乏人猶有太傅之遺風歟



國朝

武贊字全子際盛子性孝友天資穎異少補邑弟子  
員博雅工文屢試高等尤工于法書慨同邑鍾劉先  
輩爲字學之祖不使其學墜地取淳化二王虞褚等  
法書發憤臨摹真草行隸各造神妙墨跡推重一時  
求之者屢滿戶外遠近碑銘誌頌列之金石者以不  
得贊書爲愧素患怯症應酬孔繁值母病奔走禱祀  
竟以病弱卒年僅四十餘人咸悼之文廟及東君  
去思二碑猶爲世所珍重

以上書法

唐

張憬藏善相術與袁天綱齊名魏元忠少時見憬藏  
問之不答元忠怒曰窮通有命何預與君耶拂衣去  
憬藏遽起曰卿之相在怒時位必卿相姚崇李迥秀  
杜景佺俱從之遊憬藏曰三人皆宰相然姚崇最貴  
旣而果然

明

車明興號堊雲幼聰慧善圖山水人物名聞海內惟  
未見南方水牛一日裹糧往觀已而寫風雨閑忙四

景逼肖焉又有百牛圖世傳以爲至寶興生甫一月  
卽能言嘗自稱爲呂紀後身其畫不假師授盡得之  
天性云二子寵富俱中正德癸酉鄉試列科目

論曰昌黎云占小善者無不錄名一藝者無不庸  
偏端擅長豈曰無補人特患其藝之不精不患其  
人之不傳也書畫相術能竭其心思亦足名世傳  
後况大者遠者乎士君子讀書懷古安可坐自放  
廢乎哉

葛無高山大壑可以樂盤桓  
山谷長林可以供嘯傲  
所以四方遊宦擇地而居者  
自古寥寥也然民皆儉  
樸風尚淳良孫李諸君爰居  
爰處者必有取焉耳今  
中州殘毀之餘土廣民稀

聖天子方事招徠倘有稅駕高賢適我樂郊企予望之

**宋**

孫永字曼叔世爲趙人徙長社年十歲而孤祖給事中  
冲列爲子行蔭將作監主簿肄業西學郡試常第  
一冲戒之曰洛陽英俊所萃汝年少不宜多上人自

是不復試冲卒喪除復列爲孫換試御擢進士第調  
尉累官吏部尚書元祐初進資政殿學士卒謚康簡  
初神宗問青苗助役之法於民便否對曰法誠善然  
強民出息輸錢代徭不能無重歛之患若用以資經  
費非臣所知也時倉法峻密庾吏受百錢則黥爲卒  
府吏亦如之神宗又問此法旣下吏尚爲姦乎對曰  
強盜罪死犯者猶衆况配隸耶使人畏法而不革心  
雖在府吏臣亦不敢必其無犯也已而議復肉刑永  
秦日刻人肌膚深害仁政漢文帝所不忍陛下忍之

乎神宗曰事固未決待卿始定耳不果行永外和內  
勁議論常持平其他隨事匡救率多類此

李廌字方叔其先自郿徙華廌少以學問謁蘇軾于  
黃州軾稱其才爲萬人敵軾卒廌哭之慟曰吾愧不  
能死知已至於師事豈敢以生死爲間耶走汝潁間  
相地卜兆授其子作文祭之曰皇天厚土鑒一生忠  
義之心名山大川還萬古英靈之氣詞語奇壯讀者  
爲悚中年絕進取意謂潁爲人物淵藪定居長社縣  
令季佐及里人買宅處之

明

張誥字公謹直隸蠡縣人永樂間由生員守城有功授陝西盩厔縣丞後因事左遷長葛典史以病卒于官正統間遇例附籍焉孫綸字獻經中天順己卯鄉試任直隸鹽城訓導遇艱復補陝西慶陽府學訓導九年滿陞山西樂平教諭再轉豐縣所至嚴立教條善於啓迪生徒多所造就弘治年間致仕陳緣交趾利仁州人由歲貢授新鄭訓導陞長葛教諭正統間以遠方得占籍焉長子佐由歲貢任湖廣

副審理次子佑中成化戊子鄉試

論曰天下自古少寧居哉漢高遷豪傑實關中天  
下皆徙而北晉室東遷宋人南渡天下又徙而南  
其間或因遊宦或因流亡遷徙靡定不知凡幾也  
間嘗取名宗巨族譜牒考之士著者少而流寓者  
多崔盧王謝其最著者也天下何在不可安居何  
地不爲樂土又何必故鄉之思乎

列女

二南之化首及關雎蓋門內之教與王政之行相始



終也葛爲鄭之下邑秉芳規而全懿操者自古有之  
試誦雞鳴解佩之歌其風猶有存焉自鍾夫人而下  
或以德重或以節顯其淑德幽貞固足以風當世而  
垂千載矣故序人物而終之以列女者亦導民而不  
遺內教之意也夫

魏

鍾夫人張氏字昌浦太原人太傅鍾繇妻也有婦德  
繇貴妾孫氏專家政心害其賢讒毀無所不至及姬  
娠愈更嫉妬乃置藥食中夫人食而吐之輒眩者數

曰或曰何不向公言之答曰嫡庶相害破人之家古今以爲鑑戒假如公信我孰能明其事彼或心度我謂我必言固將先我言之事由彼發顧不快耶遂稱疾不見孫氏果謂成侯曰妾欲其得男故飲以良藥反謂毒之繇曰得男藥佳事聞於食中與人非人情也遂詢侍者具服孫氏由是得罪出繇問夫人何以不言夫人言其故繇大驚益以此賢之黃初六年生會

鍾氏字琰王渾妻太傅繇曾孫也數歲能屬文及長

長壽縣志 卷之六  
聰慧弘雅博覽記籍美容止善嘯詠禮儀法度爲中  
表所則渾弟湛妻郝氏亦有德行琰雖貴門與郝雅  
相親重郝不以賤下琰琰不以貴陵郝人稱鍾夫人  
之禮郝夫人之法云

明

于氏程黼妻黼任寧津知縣卒於官氏年二十六子  
顯在襁褓及長取王氏女生子玘未踰歲顯亦卒王  
年二十四家貧或諷其他適王氏泣曰吾姑守節若  
不能繼生無以見姑死無以見夫姑婦孀居終身正

統中有司奏聞旌爲雙節云

羅氏廩生張旋妻旋卒子士賢年甫一歲家貧甚羅  
惟織紡以奉翁姑垂六十餘年嘉靖三年建坊旌之  
劉氏廩生韓應祥妻祥卒劉甫二十四卽以節自誓  
歷四十餘年而卒子槃見孝行萬曆三年建坊旌表  
張氏民崔榮妻榮卒張年十九子汝節方在襁褓卽  
侍姑堅守撫子成立後補邑廩生萬曆三年有司奏  
聞建坊旌表

丁氏奉祀陳鉦妻鉦疾篤無子氏時年二十以死自

誓一日與夫訣遂自縊先死焉萬曆三年事聞詔建坊旌之丙辰進士侄君明勒其聯於坊曰以死殉夫君一片貞心摧烈日捐生留節義千秋揮淚嘆綸旌李氏民柳開妻嘉靖癸丑逆賊師尚詔等數千人入縣境石相店見氏姿色欲污不從賊持刀砍其足以威之罵不絕口遇害人稱其節

藺氏張士純妻純卒遺孤張克岐甫二歲煢煢孑立父母憐之欲奪其志藺以死自誓茹苦勤紡織孑稍長課之讀書竟以學顯補邑弟子員徐氏張綵妻綵

克岐子也綵病篤謂徐曰吾死矣汝將若何徐曰誓無他志及綵卒徐卽不食姑樊氏苦勸不從已而防閑少弛遂縊死柩前有司扁其門曰一門雙節

梅氏曹汝楫妻楫卒氏年二十五無子勵志苦節蚤爲宗祀計擇侄四知爲嗣撫養成立補邑弟子員

張氏樊宇妻宇卒氏年二十歲遺二孤長曰松次日梅並在襁褓中氏刻苦勤紡績撫子成立有司申上其事

苗氏張相妻相卒苗僅二十九子女俱無且貧甚卽

勵志堅守脩嘗艱苦歷四十餘年人尤敬之

韓氏廩生羅珠妻珠應試卒于試所韓僅十八遺孤  
羅衣尚在襁褓家貧誓無他志晝夜紡績奉姑甚謹  
撫衣成立守節五十餘載艱苦萬狀人甚稱之

陸氏呂琰妻恪嫻婦道琰卒年甫二十有三家無宿  
儲兼無子女自誓屹然足不踰閭者四十餘年節操  
凌霜士民交舉之爲旌其閭

谷氏李藩妻藩死氏年甫二十有三勵志苦守撫育  
遺孤三人各抵成立享年七十餘歲有司旌獎其門

關氏義民孟仁妻二十五歲而孀勵操至七十九歲  
之死矢靡他鄉人稱之子學思亦早卒妻范氏二十  
一歲苦誓栢舟老而益堅鄉人歎貞烈萃于一門萬  
曆間知縣朱與翹旌曰姑婦雙節崇禎間知縣聶明  
楷旌曰慈孝雙貞知縣李在公旌曰節孝齊美

孫氏生員楊春嘯之妻嘯死無子其母尚存氏矢志  
養姑晚節愈堅鄉人憫之天啓四年事聞建坊旌表  
桑氏生員桑玉之女楊慎微之妻幽貞自守勁節不  
回崇禎間寇至被掠不辱而死知縣李在公表其門



日貞烈

韓氏庠生武尚文妻崇祀鄉賢龍洲女文早卒遺孤  
二皆穉親族哀其貧以錢二十千爲賻韓辭曰吾夫  
素以廉靜自守不好與人多交今若此非夫志也拒  
而弗受將所遺田產盡付伯氏耕種事姑撫子脩極  
諸難韓不識字每課子以句讀字數計之誦不失點  
則已少誤輒朴之雖母教嚴若父師焉仲子際盛戊  
子副榜恩拔苦節三十一年五十有一  
李氏歲貢黃朝聘妻朝聘辛巳殉難誓不欲生家人

救免嗣子祚蕃甫二齡李潛移單懷育子俾有成立  
三十餘年如一日

尚氏年十七歲夫庠生呂洪勲早卒冰操甚堅教子  
允修耕讀壽七十六而卒

申氏李九功妻夫亡氏年二十六與弟婦于氏皆孀  
居盡紡織之勤爲子得先束修之資三十餘載脩極  
艱辛得先中甲午副榜乙未拔貢

孫氏邑民張華先妻先早逝氏十七而寡遺腹子曰  
行愼苦心撫育顧復有方事姑以婦代子課兒以母

兼父行慎早列弟子員果能無負母教壽六十四而卒

李氏楊慎德妻十九歲而寡苦節五十年撫子成傳聲振黌宮後子婦蕭氏亦孀能繼姑志撫二子英菁入泮稱爲一門雙節

呂氏生員張麟德妻年十八夫卒子生旬日氏哀痛矢死家人力勸之翁姑恐后無所依欲奪其志氏曰子死則晨昏無托姑去則中饋誰繼剪髮自誓翁姑憐焉止蔬勒紡皎若冰霜子耀宗以英年騰聲黌序

年逾七十邑令具額旌焉

張氏貢生楊慎思妻思早逝所遺子女四人皆妾魏氏出二母共久栢舟撫養教育艱苦脩嘗後皆成立人皆以教養之賢歸之

董氏宗士星妻夫亡氏方二十歲撫育遺孤脩嘗艱苦後以家貧翁姑欲奪其志堅志不從未幾憂鬱成疾而卒

田氏庠生楊慎成繼妻前妻所遺一子二女氏撫育教養不啻已出氏子連周援入監授吏目今遷漢中

府照磨

潘氏李思傑妻年十八而寡撫育孤子以至成立性至孝姑常卧病百方侍藥終身不懈孀居五十餘載卒邑令以栢舟砥節旌之

袁氏憲副邢國璽妻國璽死王事子爲法爲憲守城不屈死俱見列傳氏與仲婦董氏季婦高氏并携其十齡女孫自山左旋里次曹邑值土氛起居民奔竄家人告曰事急矣請他往氏給之曰偵賊信得實未晚也乃與二媳閉門久不出家人促之方知姑媳俱